

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj 07/10), a u vezi sa članom 41. stav 2. Zakonom o izvršenju Budžeta Zeničko-dobojskog kantona za 2012. godinu ("Službene novine Zeničko-dobojskog kantona", broj 05/12), Vlada Zeničko-dobojskog kantona, na prijedlog Ministarstva za poljoprivredu, šumarstvo i vodoprivredu, na 64. sjednici održanoj 24.05.2012. godine, d o n o s i

ZAKLJUČAK
o usvajanju Programa utroška sredstava Budžeta
za poticaje u poljoprivredi u 2012. godini

I.

Usvaja se Program utroška sredstava Budžeta za poticaje u poljoprivredi u 2012. godini, u razdjelu 23, budžetska organizacija 01, potrošačka jedinica 0001, Budžeta Zeničko-dobojskog kantona za 2012. godinu, ekonomski kod 614 400, NAD 402, u iznosu od 2.000.000,00 KM (slovima: dvamiliona konvertibilnih maraka).

II.

Sredstva iz tačke I. ovog zaključka, realizovat će se u skladu sa odobrenim mjesečnim operativnim planovima, a usklađeno sa realizacijom ostvarenih javnih prihoda u prethodnom mjesecu, osim u slučajevima odobrenim posebnom odlukom Vlade Kantona.

III.

Za realizaciju ovog zaključka zadužuju se Ministarstvo za poljoprivredu, šumarstvo i vodoprivredu i Ministarstvo finansija, svako u okviru svojih nadležnosti.

IV.

Zaključak stupa na snagu danom donošenja.

Broj: 02-_____/12.
Datum, 24.05.2012. godine
Zenica

PREMIJER

mr.sci. Fikret Plevljak, dipl.ing.

DOSTAVLJENO:

1x Ministarstvu za poljoprivredu, šumarstvo i vodoprivredu,
1x Ministarstvu finansija,
1x a/a.



P R O G R A M
UTROŠKA SREDSTAVA BUDŽETA ZA POTICAJE U
POLJOPRIVREDI U 2012. GODINI

ZENICA
MAJ 2012. GODINE

PROGRAM
Utroška sredstava Budžeta Zeničko-dobojskog kantona
za poticaje u poljoprivredi za 2012. godinu

Podaci o Programu

1. Program je usvojen: na 64. sjednici Vlade Zeničko-dobojskog kantona održanoj 24.05.2012. godine.
2. Period realizacije Programa: Isplata podrški za poljoprivredne proizvodnje koje su realizovane u periodu od 01. 01. do 31. 12. 2012. godine.
Napomena: U ovom periodu izvršit će se i isplata podrški za proizvodnje koje su započete u 2011. godini, a završene u 2012. godini.
3. Ukupna vrijednost Programa: **2.000.000,00 KM**
4. Namjena Programa: Podrška primarnoj animalnoj i biljnoj proizvodnji, preradivačima i otkupljivačima, te kapitalnim ulaganjima u poljoprivredi.
5. Korisnici Programa: Poljoprivredni proizvođači, zadruge, udruženja poljoprivrednika i preradivači prehrambenih proizvoda.
6. Izvor sredstava: Budžet Zeničko-dobojskog kantona za 2012. godinu - Budžet Ministarstva za poljoprivredu, šumarstvo i vodoprivredu - „Subvencije za podsticaj razvoja u poljoprivrednoj proizvodnji“, razdjel 23, budžetska organizacija 01, potrošačka jedinica 0001, ekonomski kod 614400, NAD 402 i „Zakon o izvršenju Budžeta Zeničko- dobojskog kantona“ ("Službene novine Zeničko- dobojskog kantona", broj: 05/12)
7. Odgovorna osoba: Samir Selimović, ministar

I UVOD

U Zakonu o poljoprivredi (*"Službene novine Federacije BiH"*, broj: 88/2007) utvrđeni su pravci budućeg razvoja poljoprivrede. Razvoj se u značajnoj mjeri oslanja na podsticajna sredstva iz Federalnog i kantonalnih budžeta i što je nivo podsticajnih sredstava bliži podsticajima u okruženju (Hrvatska i Srbija), to je realnije očekivati razvoj poljoprivrede na našem području.

Po Programu za 2012. godinu ukupno opredijeljena sredstva za podsticaje u poljoprivredi iznose 2.000.000,00 KM.

U izradi Programa za 2012. godinu korišteni su slijedeći parametri:

- Proizvodne resursne mogućnosti Zeničko-dobojskog kantona,
- Preporuke Srednjoročne strategije razvoja i Zakona o poljoprivredi,
- Kontinuitet podsticajnih mjera,
- Mogućnosti plasmana podsticanih proizvodnji,
- Preporuke stručnih poljoprivrednih službi Ministarstva koje neposredno na terenu prate kretanja u poljoprivrednoj proizvodnji i prerađivačkim kapacitetima prehrambene industrije i
- Preporuke naučnih i stručnih institucija iz sektora.

Ispoštovan je dogovor sa Federalnim ministarstvom poljoprivrede, vodoprivrede i šumarstva oko harmonizacije podsticaja, u smislu da nema preklapanja federalnih i kantonalnih podsticaja. Izuzetno preklapat će se oni podsticaji koji po kriterijima sa federalnog nivoa nisu ostvarivi za naše proizvođače, to znači da nijedan proizvođač ne može ostvariti po dva osnova isti podsticaj.

U skladu sa raspoloživim sredstvima, mjere podrške u poljoprivredi iz Budžeta Zeničko-dobojskog kantona za 2012. godinu su usmjerene prema slijedećim proizvodnjama i aktivnostima.

A/ Podrška poljoprivrednoj proizvodnji

A/1 Animalna proizvodnja

- Premija za uzgoj priplodnih junica,
- Premija za uzgoj brojlera,
- Premija za proizvodnju konzumnih jaja,
- Premija za krave u laktaciji,
- Podrška u finansiranju mliječnih kartona,
- Podrška za uzgoj autohtone ovce „Pramenke“
- Podrška veterinarskim stanicama sa potpisanim ugovorima za kandidiranje junica

A/2 Biljna proizvodnja

- Premija za proizvodnju presadnica povrća,
- Premija za proizvodnju povrća i cvijeća u plastenicima i staklenicima,
- Premija za proizvodnju maline,
- Premija za proizvodnju američke borovnice
- Premija za proizvodnju gljiva
- Premija za proizvodnju organske heljde i spelte
- Premija za zasnivanje novih zasada maline i borovnice
- Premija za zasnivanje novih zasada voća-visokostablašica

B/ Podrška prerađivačima i otkupljivačima poljoprivrednih proizvoda

B/1 Podrška prerađivačima

- Premija prerađivača mlijeka sa područja ZE-DO kantona,
- Premija prerađivačima pilećeg mesa,

B/2 Podrška otkupljivačima

- Premija otkupljivačima svježeg kravljeg mlijeka,
- Premija otkupljivačima za otkup svježeg voća i povrća,
- Premija za otkup jagodičastog voća,
- Premija za otkup jagodičastog voća otkupljivačima koji vrše zamrzavanje,

C/ Podrška kapitalnim ulaganjima

- Podrška za nabavku mehanizacije za poljoprivredu,
- Podrška za nabavku plastenika,

D/ Podrška projektima

- Podrška za ujednačeni razvoj poljoprivrede,
- Finansiranje izrade strategije razvoja poljoprivrede na ZE-DO kantonu,
- Medijsko predstavljanje poljoprivrede na ZE-DO kantonu
- Finansiranje sajмова i izložbi,
- Finansiranje i štampanje edukativnog i propagadnog materijala iz oblasti, poljoprivrede te nabavka repromaterijala za IPS,

II KRITERIJI ZA RASPODJELU SREDSTAVA

Odobrena finansijska sredstva iz budžeta Zeničko-dobojskog kantona pod stavkom "Subvencije za podsticaj razvoja u poljoprivrednoj proizvodnji" opredjelit će se fizičkim i pravnim licima (u daljem tekstu: korisnici) prema općim i posebnim kriterijima.

1. Opći kriteriji

Pravo na ostvarivanje podrški stiču:

- korisnici koji su ostvarili primarnu poljoprivrednu proizvodnju ili poljoprivrednu djelatnost obavljaju na teritoriji Zeničko-dobojskog kantona, ako to ovim Programom ili Uputstvom nije drugačije propisano.
- korisnici koji imaju stalno mjesto prebivališta, odnosno za pravna lica sjedište, na području Zeničko-dobojskog kantona.
- korisnici koji su upisani u registar gazdinstava/klijenata.

2. Posebni kriteriji

- korisnici koji po bilo kojem osnovu nisu izmirili svoja dugovanja prema kantonu neće moći ostvariti pravo na poticaje.
- nepotpuni ili netačno popunjeni, neblagovremeni i izvan propisane procedure dostavljeni zahtjevi neće biti uzeti u razmatranje.
- korisnici koji ispunjavaju posebno propisane kriterije predviđene ovim Programom i Uputstvom o ostvarivanju novčanih podrški za poljoprivrednu proizvodnju ili djelatnost u poljoprivredi u 2012. godini (u daljem tekstu Uputstvo), koje donosi Ministar Ministarstva za poljoprivredu, šumarstvo i vodoprivredu Zeničko-dobojskog kantona.

III PODSTICANJE PROIZVODNJI

A/1 Animalna proizvodnja

1. **Premija za uzgoj priplodnih junica** - premiraju se dvije kategorije kvalitetnih junica sa iznosima: za I kategoriju 400 KM/grlo, za II kategoriju 200 KM/grlo . Zahtjev za premiju podnosi se za jednu uzgojenu junicu. Junice moraju biti uzgojene na vlastitoj farmi od vlastitih krava, u fazi prve steonosti, vještački osjemenjene i majke i junice, te da ispunjavaju i druge kriterije koji će biti propisani Uputstvom.
2. **Premija za uzgoj brojlera** - premiraju se utovljeni brojleri sa 0,08 KM/brojler, kod registrovanih farmi koje imaju do dva (2) uposlena radnika i registrovane farme sa više od dva (2) uposlena radnika sa 0,10 KM/brojler, koji u vlastitim ili zakupljenim objektima utove najmanje 5.000 brojlera u turnusu, sa subjektom registrovanim za preradu brojlerskog mesa imaju sklopljen ugovor o kooperaciji, te da ispunjavaju i druge kriterije koji će biti propisani Uputstvom
3. **Premija za proizvodnju konzumnih jaja** - premiraju se registrovane farme sa useljenim 18-nedjeljnim pilenkama -lahke linije koje upošljavaju do dva (2) radnika sa 0,8 KM/pilenki, i registrovane farme sa više od dva (2) uposlena radnika sa 1,00 KM/pilenki. Proizvodnja može biti u vlastitom ili zakupljenom objektu na području ZE-DO kantona, koji imaju minimalno 1.500 pilenki, te da ispunjavaju i druge kriterije koji će biti propisani Uputstvom.
4. **Premija za krave u laktaciji**-premiraju se krave u laktaciji u dvije kategorije. Prva kategorija odnosi se na registrovane farme za uzgoj krava u laktaciji sa 200 KM/grlu i imaju minimalno pet (5) grla. Druga kategorija odnosi se na krave u laktaciji koje se premiraju sa 100 KM/grlu kod farmera koji imaju minimalno dva (2) grla, te da ispunjavaju i druge kriterije koji će biti propisani Uputstvom.
5. **Podrška u finansiranju mliječnih kartona**-sufinansira se izrada mliječnih kartona za krave u laktaciji sa 10 KM/grlu, kod proizvođača koji su u sistemu otkupa mlijeka ili su registrovani za preradu mlijeka u vlastitom domaćinstvu, te da ispunjavaju i druge kriterije koji će biti propisani Uputstvom.
6. **Podrška za uzgoj autohtone ovce „Pramenke“**- podržavaju se u tri kategorije. U prvoj kategoriji sa premijom 250 KM/stadu, premiraju se stada sa 50 do 150 ovaca. Druga kategorija sa premijom 350 KM/stadu, premiraju se stada sa 150 do 300 ovaca. Treća kategorija sa premijom 450 KM/stadu, premiraju se stada iznad 300 ovaca, te da ispunjavaju i druge kriterije koji će biti propisani Uputstvom.
7. **Podrška veterinarskim stanicama, sa potpisanim ugovorima, za kandidiranje junica**-podržavaju se veterinarske stanice sa područja ZE-DO kantona ili veterinarske stanice sa sjedištem iznad Kantona koje imaju potpisane ugovore sa općinama o pružanju veterinarskih usluga, podržavaju se sa 20 KM/grlu za kandidiranje junica za premiju. Prava na podršku imaju veterinarske stanice koje sa Ministarstvom za poljoprivredu, šumarstvo i vodoprivredu imaju potpisan ugovor o saradnji te ispunjavaju i druge kriterije koji će biti propisani Uputstvom.

A/2 Biljna proizvodnja

8. **Premija za proizvodnju presadnica povrća** – premira se registrovana proizvodnja presadnica povrća u iznosu od 0,05 KM po proizvedenoj presadnici povrća do 500.000 presadnica, te da ispunjavaju i druge kriterije koji će biti propisani Uputstvom.
9. **Premija za proizvodnju povrća i cvijeća u plastenicima i staklenicima** – ova podrška dijeli se u tri kategorije. U prvoj kategoriji sa 5KM/m² minimalne površine 500 m², podržavaju se poljoprivredni proizvođači (fizička lica) koji imaju registrovanu poljoprivrednu djelatnost (kao osnovnu djelatnost). U drugoj kategoriji sa 2KM/m² podržavaju se neregistrovani proizvođači i pravna lica za proizvodnju povrća minimalne površine od 400 m² plastenika ili staklenika. U trećoj kategoriji podržavaju se registrovani proizvođači cvijeća sa 1 KM/m², a proizvodnju organizuju u plastenicima ili staklenicima minimalne površine od 200 m², te da ispunjavaju i druge kriterije koji će biti propisani Uputstvom
10. **Premija za proizvodnju maline** - premira se proizvodnja maline sa 0,20 KM/kg, kod proizvođača koji imaju zasnovan zasad maline i koji predaju otkupljivaču/prerađivaču minimalno 500kg maline, te da ispunjavaju i druge kriterije koji će biti propisani Uputstvom.
11. **Premija za proizvodnju Američke borovnice** – premira se proizvodnja Američke borovnice-plantažni uzgoj sa 0,30 KM/kg kod proizvođača koji imaju zasade borovnice i koji predaju otkupljivaču/prerađivaču proizvedenu borovnicu, te da ispunjavaju i druge kriterije koji će biti propisani Uputstvom.
12. **Premija za proizvodnju gljiva** – premira se proizvodnja gljiva (šampinjona i bukovača) sa 12,00 KM/toni kupljenog komposta, kod proizvođača koji su proizvodnju gljiva registrovali kao djelatnost, te da ispunjavaju i druge kriterije koji će biti propisani Uputstvom.
13. **Premija za proizvodnja organske heljde i spelte** – premira se proizvodnja heljde i spelte sa 350,00 KM/ha, kod proizvođača koji imaju certifikat za organsku proizvodnju ovih kultura. Pravo na premiju mogu ostvariti samo proizvođači koji imaju zasijanu površinu veću od 1 ha, te da ispunjavaju i druge kriterije koji će biti propisani Uputstvom.
14. **Premija za zasnivanje novih zasada maline, kupine i borovnice**– premira se zasnivanje novih zasada maline, kupine i borovnice na površini od 1 – 5 dunuma, sa iznosom od 300 KM/dunumu, te da ispunjavaju i druge kriterije koji će biti propisani Uputstvom.
15. **Premija za zasnivanje novih zasada voća (visokostablašice)** – ova podrška se realizuje kroz dvije kategorije. Prva kategorija se odnosi na podršku od 300 KM/dunumu za poluintezivne zasade voća-visokostablašica (jabuka, kruška, šljiva, trešnja, višnja, lješnik, kajsija, breskva i vinova loza,), na površinama od 2 – 5 dunuma. Druga kategorija odnosi se na podršku od 500 KM/dunumu za intezivne zasade voća-visokostablašica (jabuka, kruška, šljiva, trešnja, višnja, lješnik, kajsija, breskva i vinova loza,), na površinama od 2 – 5 dunuma, te da ispunjavaju i druge kriterije koji će biti propisani Uputstvom.

B/ Podrška prerađivačima i otkupljivačima poljoprivrednih proizvoda

B/1 Podrška prerađivačima

16. **Premija prerađivačima mlijeka sa područja ZE-DO kantona** - premiraju se mljekare za otkup mlijeka od proizvođača sa područja Kantona sa 0,02 KM/lit., koje za istu količinu po kriterijima Federalnog Ministarstva poljoprivrede, vodoprivrede i šumarstva ostvare premiju za mlijeko za svoje kooperante, te da ispunjavaju i druge kriterije koji će biti propisani Uputstvom.
17. **Premija prerađivačima pilećeg mesa** - premiraju se registrovani prerađivači brojlerskog mesa sa 0,10 KM/kg, za proizvodnju organizovanu kod kooperanata sa kojima imaju sklopljene ugovore o proizvodnji i otkupu, maksimalan iznos po jednom subjektu je 300.000 kg, te da ispunjavaju i druge kriterije koji će biti propisani Uputstvom.

B/2 Podrška otkupljivačima

18. **Premija otkupljivačima za otkup svježeg kravljeg mlijeka** - premiraju se registrovani otkupljivači mlijeka sa 0,02 KM/lit. za količine mlijeka po kojim njihovi kooperanti ostvare premiju za mlijeko po kriterijima Federalnog Ministarstva poljoprivrede, vodoprivrede i šumarstva i sa kojima imaju sklopljene ugovore o proizvodnji i otkupu mlijeka, te da ispunjavaju i druge kriterije koji će biti propisani Uputstvom.
19. **Premija otkupljivačima za otkup svježeg voća i povrća** - premiraju se registrovani otkupljivači voća i povrća (izuzev jagodičastog voća) sa 0,02 KM/kg koji od proizvođača sa kojima imaju sklopljene ugovore o proizvodnji i otkupu voća i povrća izvrše otkup, a maksimalan iznos podrške po jednom subjektu iznosi 10.000,00 KM, te da ispunjavaju i druge kriterije koji će biti propisani Uputstvom.
20. **Premija otkupljivačima jagodičastog voća**- premiraju se registrovani otkupljivači voća sa 0,04 KM/kg jagodičastog voća koji od proizvođača sa kojima imaju sklopljene ugovore o otkupu voća izvrše otkup, te da ispunjavaju i druge kriterije koji će biti propisani Uputstvom.
21. **Premija otkupljivačima jagodičastog voća koji vrše zamrzavanje**- premiraju se registrovani otkupljivači voća sa 0,10 KM/kg jagodičastog voća koji od proizvođača sa kojima imaju sklopljene ugovore o otkupu voća izvrše otkup i iste zamrznu te da posjeduju ili imaju iznamljene komore za zamrzavanje, te da ispunjavaju i druge kriterije koji će biti propisani Uputstvom.

C/ Podrška kapitalnim ulaganjima

22. **Podrška za nabavku mehanizacije za poljoprivredu** - podržava se nabavka mehanizacije za poljoprivredu (traktori, samohodne kosačice i motokultivatori) u iznosu do 25% vrijednosti mehanizacije, što poljoprivredni proizvođač dokazuje računima o kupovini (porezna faktura). Podrška se odnosi na nove mašine, te da ispunjavaju i druge kriterije koji će biti propisani Uputstvom.
23. **Podrška za nabavku plastenika-** podržava se sa 6 KM/m² nabavka plastenika minimalne površine 100 m², a maksimalne 500 m². Podrška se nabavka novih plastenika nabavljenih od registrovanih proizvođača plastenika sa područja ZE-DO kantona uz priložene račune za nabavku (porezna faktura), te da ispunjavaju i druge kriterije koji će biti propisani Uputstvom.

D/ Podrška projektima

24. **Podrška za ujednačen razvoj poljoprivrede na području Zeničko-dobojskog kantona** – s ciljem ravnomjernijeg razvoja poljoprivrede na cijelom području Zeničko-dobojskog kantona u 2011. godini, iz ukupnog budžeta za poticaje u poljoprivredi izdvaja se 143.000,00 KM za šest općina Kantona (Maglaj, Olovo, Usora, Kakanj, Zavidovići i Vareš), koje su u posljednje četiri godine imale najnižu realizaciju poticaja. Sredstva će se odobravati na osnovu projekata koje će dostavljati poljoprivredne zadruge, udruženja poljoprivrednih proizvođača, preduzeća registrovana za obavljanje poljoprivredne djelatnosti , općine putem službi nadležni za poljoprivredu i inividualni poljoprivredni proizvođači. Ocjenu projekta vršit će stručna komisija koju će formirati Ministar Ministarstva za poljoprivredu, šumarstvo i vodoprivredu Zeničko-dobojskog kantona. Ova obaveza je prenesana iz Programa poticaja 2011. godine u Program poticaja za 2012.godinu.
25. **Finansiranje strategije razvoja poljoprivrede na području ZE-DO kantona-** u 2012. godini planirano je provođenje procedure za izbor kvalifikovanog subjekta za izradu strategije razvoja poljoprivrede na području ZE-DO kantona. Planiran iznos od 20.000 KM predviđen je za, eventualno Ugovorom predviđenu obavezu, avansiranjem ovog posla.
26. **Medijsko predstavljanje poljoprivrede-**u svrhu upoznavanja poljoprivrednih proizvođača sa predviđenim poticajima za poljoprivrednu proizvodnju u 2012. godini iz Budžeta Zeničko-dobojskog kantona, te afirmativnog predstavljanja razvoja poljoprivredne proizvodnje na području ZE-DO kantona i davanja drugih informacija vezanih za rad Ministarstva za poljoprivredu, šumarstvo i vodoprivredu Zeničko-dobojskog kantona, predviđen je iznos od 20.000 KM. Ministarstvo za poljoprivredu, šumarstvo i vodoprivredu Zeničko-dobojskog kantona potpisat će Ugovor sa jednom televizijskom kućom koja će preuzeti obavezu promovisanja poljoprivrede u skladu sa naprijed navedenim ciljevima.
27. **Finansiranje sajmovi i izložbi u 2012.godine-** planirano je sufinansiranje dvije izložbene sajmovske izložbene manifestacije „ Opens 2012 u Zenici“ i „Jesen u Visokom“

28. **Finansiranje i štampanje edukativnog i propagadnog materijala iz oblasti poljoprivrede te nabavke repromaterijala za Izvještajno prognoznju službu**-u cilju što efikasnijeg informisanja poljoprivrednih proizvođača o poticajima iz Programa poticaja za 2012. godinu, predstavljanja istaknutih poljoprivrednih subjekata sa područja ZE-DO kantona, štampanje letaka oko prepoznavanju alergenih biljaka (ambrozija) i nabavke repromaterijala (lovne klopke, feromoni i dr.) za Izvještajno prognoznju službu. Na području ZE-DO kantona instalirano je pet agrometeoroloških stanica sa kojih se prikupljaju meteoroloških podaci koji su relevantni za pojavu biljnih bolesti na voćnim zasadima.

E/ Rezerva

Sredstva rezervi koristiti će se za hitne i nepredviđene intervencije koji se pojave tokom budžetske godine, u skladu sa utvrđenim kriterijima u Programu i Uputstvu.

**TABELARNI PREGLED POTICAJA U POLJOPRIVREDI ZA 2012 GODINU
SA IZNOSIMA POTICAJA PO JEDINICI MJERE**

	NAZIV POTICAJA	Iznos poticaja izražen po jedinici mjere	Procjena iznosa potrebnih sredstava u (KM)
1.	Premija za uzgoj priplodnih junica	I kat. 400 KM/grlu II kat. 200 KM/grlu	240.000,00
2.	Premija za uzgoj brojlera –registrovane farme	Do 2 uposlana 0,08 KM/kljun Više od 2 uposlana 0,10 KM/ /kljunu	230.000,00
3.	Premija za proizvodnju konzumnih jaja-registrovane farme	Do 2 uposlana 0,8 KM/pilenki Više od 2 uposlana 1,0 KM/pilenki	55.000,00
4.	Premija za krave u laktaciji	Registrovane farme sa 5 i više grla u laktaciji 200 KM/grlu Neregistrovane farme sa 2 ili više grla u laktaciji 100 KM/grlu	255.000,00
5.	Podrška u finansiranju mlječnih kartona	10,00 KM/grlu	59.650,00
6.	Podrška za uzgoj autohtone ovce „Pramenke“	Stada od 50-150 grla 250 KM/stadu Stado od 150-300 grla 350KM/stadu Stado preko 300 grla 450KM/stadu	70.000,00
7.	Podrška veter.stanicama, sa potpisanim ugovorima, za kandidiranje junica	20 KM/grlu	12.000,00
A/1 UKUPNO ANIMALNA			921.650,00
8.	Premija za proizvodnju presadnica povrća za registrovane reprocentre	0,05 KM/kom.	28.000,00
9.	Premija za proizvodnju povrća i cvijeća u plastenicima i staklenicima	Registrovani proizvođači povrća sa minimalno 500m ² i više 5,00KM/m ² Pravna lica i neregistrovani proizvođači povrća sa 400 m ² i više 2,00 KM/m ² Registrovani proizvođači cvijeća sa minimalno 200m ² i više 1,00KM/m ²	205.000,00
10.	Premija za proizvodnju maline	0,20 KM/kg	90.000,00
11.	Premija za proizvodnju Američke borovnice	0,30 KM/kg	4.000,00
12.	Premija za proizvodnju gljiva	12,00 KM/toni komposta	24.000,00
13.	Premija za proizvodnju organske heljde i spelte	350,00 KM/ha	7.000,00
14.	Premija za nove zasade maline,kupina i borovnice (Od 0,1 ha do 0,5 ha)	300,00 KM/0,1 ha	40.000,00
15.	Premija za nove zasade voća visokostablašica (Od 0,2 ha do 0,5 ha)	Poluintezivni 300 KM/0,1 ha Intezivni 500 KM/0,1ha	50.000,00
A/2 UKUPNA BILJNA PROIZVODNJA			448.000,00
16.	Premija prerađivačima mlijeka	0,02 KM/litru	80.000,00
17.	Premija prerađivačima pilećeg mesa	0,10 KM/kg	55.000,00
B/1 UKUPNO PRERAĐIVAČI			135.000,00

Ministarstvo za poljoprivredu, šumarstvo i vodoprivredu

18.	Premija za otkup mlijeka otkupljivačima mlijeka	0,02 KM/litru	40.000,00
19.	Premija otkupljivačima svježeg voća i povrća (izuzev jagodičastog voća)	0,02 KM/kg	35.000,00
20.	Premija otkupljivačima jagodičastog voća	0,04 KM/kg	15.000,00
21.	Premija za otkup jagodičastog voća otkupljivačima koji vrše zamrzavanje	0,10 KM/kg	30.000,00
B/2 UKUPNO OTKUPLJIVAČI			120.000,00
22.	Podrška za kupovinu poljoprivredne mehanizacije	Do 25% vrijednosti mašine	90.000,00
23.	Podrška za nabavku plastenika (minimalne površine 100 m ² , a maksimalne površine za nabavku plastenika je 500 m ²)	6KM/ m ²	80.000,00
C/ UKUPNO KAPITALNA ULAGANJA			170.000,00
24.	Podrška za ujednačen razvoj		143.000,00
25.	Finansiranje izrade strategije razvoja poljoprivrede na području Zeničko-dobojskog kantona (dio sredstava)		20.000,00
26.	Medijsko predstavljanje poljoprivrede		20.000,00
27.	Finansiranje sajмова i izložbi		15.000,00
28.	Finansiranje i štampanja edukativnog i propagadnog materijala iz oblasti poljoprivrede(brošure i letci), te nabavka repromaterijala za IPS		5.000,00
D/ UKUPNO PROJEKTI			203.000,00
E/ REZERVA			2.350,00
SVEUKUPNO POTICAJI ZA 2012. GODINU			2.000.000,00

Napomena: Kolona pod nazivom procjena potrebnih iznosa sredstava u KM je samo projekcija mogućeg utroška sredstava, tako da će ovisno o broju zahtjeva biti prelijevanja sredstava iz jednog poticaja u drugi.

IV NAČIN OSTVARIVANJA PODRŠKI

Podrške ostvaruju korisnici koji ispunjavaju opće i posebne uslove propisane ovim Programom i Uputstvom, kojim će se utvrditi postupak i potrebna dokumentacija te obrasci i drugi relevantni podaci.

Ukoliko drugačije nije propisano Uputstvom, korisnici koji ostvare proizvodnju ili otkupe određene poljoprivredne proizvode podnose nadležnom općinskom organu propisanu dokumentaciju za ostvarivanje podrški, a općinski organ kompletiranu dokumentaciju proslijeđuje na protokol Kantona.

Daljnji postupak sa zahtjevima korisnika provodi se u skladu sa Procedurom za ostvarivanje prava na novčane podrške u primarnoj poljoprivrednoj proizvodnji ZE-DO-PR-023 i Procedurom za ostvarivanje poticaja u stočnoj proizvodnji ZE-DO.PR:024 utvrđenim u standardima BAS EN ISO 9000:2000 i BAS EN ISO 9001-2000.

Izuzetno, ako je to u njegovom interesu, korisnik može aplicirati za ostvarivanje podsticaja u poljoprivredi, poštom ili direktnom predajom dokumentacije na protokol Kantona.

V SVRHA PROGRAMA

Svrha ovog Programa je da se nastave započeti i otvore novi procesi u poljoprivrednom sektoru, s ciljem da se ostvari;

- a. povećanje obima poljoprivredne proizvodnje,
- b. zadovoljavanje potreba domaćeg tržišta vlastitim proizvodima,
- c. snabdijevanje prehrambene industrije sirovinama,
- d. stabilizacija tržišta poljoprivredno-prehrambenih proizvoda,
- e. razvoj prehrambene industrije,
- f. unapređenje rada zadruga i udruženja poljoprivrednih proizvođača,
- g. smanjivanje ovisnosti od uvoza i stvaranje pretpostavki za izvoz,
- h. stvaranje tržišno orijentisanih proizvođača,
- i. povećanje sjetvenih površina i privođenje kulturi neobrađenog obradivog poljoprivrednog zemljišta i
- j. ravnomjerniji razvoj poljoprivredne proizvodnje na području ZE-DO kantona,
- k. veće zapošljavanje i smanjenje stope nezaposlenosti.

VI IZVORI SREDSTAVA

Izvor sredstava za realizaciju Programa je Budžet Zeničko-dobojskog kantona za 2012. godinu ("*Službene novine Zeničko-dobojskog kantona*", broj:05/12), u kojem je na stavci "Subvencije za podsticaj razvoja u poljoprivrednoj proizvodnji" u razdjelu 23. budžetska organizacija 01, potrošačka jedinica 0001, ekonomski kod 614400, NAD 402 planiran iznos od 2.000.000,00 KM. Planirani iznos će se realizovati u skladu sa prilivom sredstava u Budžetu, a na bazi mjesečnih operativnih planova.

VII KORISNICI SREDSTAVA

Korisnici sredstava su fizička i pravna lica koja ispune propisane opće i posebne kriterije iz ovog Programa i Uputstva (poljoprivredni proizvođači, zadruge, udruženja poljoprivrednih proizvođača, prerađivači poljoprivrednih proizvoda i dr.)

Broj: 02-_____/12.

Datum, 24.05.2012. godine

Zenica

PREMIJER

mr.sci. Fikret Plevljak, dipl.ing.

DOSTAVLJENO:

1x Ministarstvu za poljoprivredu, šumarstvo i vodoprivredu,

1x Ministarstvu finansija,

1x a/a.